

P. Gouaga

as

SACRA CONGREGATIO DE SEMINARIIS
ET STUDIORUM UNIVERSITATIBUS

DECRETUM

Catholica Studiorum Universitas Navarrensis in Hispanica ditione erigitur.

Erudiendae instituendaeque iuventae Santa Mater Ecclesia summa contentione semper prospexit, nullis laboribus impensive parcens, adolescentibus adultisque sanam luculentamque doctrinam praebendo ne "variis et peregrinis abducerentur... fabulis (Hebr.13,9; II Tim.4,3-4), sed "gens sancta, populus acquisitionis", immo et "regale sacerdotium" Deo hominibusque pararentur, in omnium salutem, quae Veritate nititur, opem praestituri. Quod praecipue in illis regionibus factum est unde catholica fides sine intermissione gentibus effulsit, Ecclesiae magisterio fidelissime retento, sicut de Hispania omnibusque hispanico idiomate utentibus nationibus constantissime liquet. Celeberrimae enim memorandae veniunt clericorum laicorumque scholae a perinsigni Ecclesiae Doctore S. Isidoro Hispalensi in catholici populi profectum inceptae, Salmanticense Pontificium Regiumque Studium Generale, cuius surculi exstiterunt Manilana, Dominicana, Limana aliaeque a Summis Pontificibus erectae studiorum Universitates.

Tot praeclara redintegrantes, sodales Societatis Sacerdotalis Sanctae Crucis et Operis Dei, hodiernis exultiorum adolescentium necessitatibus provide consulentes, Centrum Superiorum Studiorum, "Estudio General de Navarra" nuncupatum, a.D. MCMLII inchoaverunt, cuius laeta primordia, paterne impellente Nuntio Apostolico apud Hispanos planeque faventibus tum Sancta Sede tum loci Ordinariis, in primis Pampilonensi, tantis incrementis invaluerunt ut omnes praecipuae Facultates ("Escuelas"), quibus pleniores studiorum Universitates de more constant, Studio Generali Navarrensi paulatim accesserint. Simul duo instruebantur instituta, ad scientificam moralemque alumnorum institutionem fovendam, "Praeceptores" ("Jefes de estudio") nempe, quorum est unumquemque discipulum curare tuerique, atque "Collegia" ("Colegios Mayores") quibus alumnorum institutio religiosa, humanistica, socialis, optimis praeiunctis ecclesiasticis viris aliisque "Operis Dei" membris, opportunis aptisque mediis completur.

Cum Facultatum seu Scholarum incrementum Sacra Congregatio de Seminariis et studiorum Universitatibus merito laudaret, ac de qualibet Facultate catholicis doctrinis ditanda assidue consuleret, Decreto d.d. XII m. Iunii a. D. MCMLIX "Institutum Canonisticum" in Facultate Iuridica eiusdem Studii Generalis Navarrensis condidit, idque Pontificio Instituto Utriusque Iuris Lateranensis Urbis Universitatis aggregavit, cuius esset academicos gradus tum baccalaureatus tum licentiae Iuris Canonici, approbatis Statutis ad amussim servatis, selectis alumnis post superata examina conferre. Nunc autem, attentis Praesidis Generalis laudatae Societatis Sacerdotalis Sanctae Crucis et Operis Dei humillimis precibus, tum Apostolici Nuntii Matritensis tum Archiepiscopi Pampilonensis supplicibus commendationis litteris suffultis, ipsorumque civilium Magistratum, qui Studium Generale Navarrense summa benevolentia prosequuntur, instantissimis rogationibus benigne acceptis, eadem Sacra Congregatio de tanto negotio certiore fecit Augustum Pontificem fel. regn. Cum autem Ss^{us} Dominus Noster Ioannes Div. Prov. Pp. XXIII perlibenter annuere dignatus sit, memorata S. Congregatio de Seminariis et studiorum Universitatibus, post approbata peculiaria C.I.C. pro munere deliberavit. Hisce igitur, ad gloriam Dei O.M., ad Sanctae Catholicae Ecclesiae decus ac incrementum atque

ad animarum proventum "Catholicam studiorum Universitatem Navarrensem" in civitate archiepiscopali Pampilonensi vigentem, sodalibus laudatae Societatis Sanctae Crucis et Operis Dei commissam, pro munere constituit erigitque atque in perpetuum erectam declarat, quatuor studiorum Facultatibus praeditam (Iuris cum Instituto Iuris Canonici, Medicinae cum adnexa Schola Infirmariorum, Philosophiae Litterarumque cum Sectione Historiae, Scientiarum Mathematico-Physico-Chimicarum) necnon Instituto Superiore Periodismi aliisque vel nuper inceptis vel mox incipiendis ꝛ in primis Instituto Superiorum Studiorum de officinarum praepositis catholice instruendis, in Barcinonensi metropoli non ita pridem inchoato- necnon Facultate Machinariorum ("Escuela de Ingeniería" in Sancti Sebastiani urbe hoc exeunte anno condenda),- ipsi Catholicae Universitatis prorsus agnitis iuribus, honoribus, privilegiis, quae ad huiusmodi Athenaea in universo Catholico Orbe spectant.

Sacra eadem Congregatio insuper praecipit ut omnia ad effectum traducantur quae approbata Statuta tum de coetu curatorum ac de moderatoribus praescribunt tum de magistrorum discipulorumque officiis definiunt, in primis de Sacra eadem Congregatione statis temporibus edocenda eademque roganda de novo Rectore nominando, de nova Facultate vel Superiorum Studiorum forte inchoandis, de quavis in Statuta a Sede Apostolica probata mutatione inducenda. Ceteris servatis de iure servandis; contrariis quibuslibet minime obstantibus.

Datum Roma, ex aedibus S. Congregationis, d.VI m. Augusti, in festo Transfigurationis D.N.I.Ch., a.D. MCMLX

+ I.Card. PIZZARDO, Ep. Albanen., Praefectus

L. + S.

Dinus Staffa, a Secretis